

Na osnovu člana 13. stav 2. alineja 1. Zakona o principima lokalne samouprave („Službene novine Federacije BiH“, broj 49/06 i 51/09) i člana 25. stav 1. alineja 1., a u vezi sa članom 164. Statuta Grada Tuzle („Službeni glasnik Grada Tuzla“, broj 6/21), Gradsko vijeće Tuzla, na prijedlog Komisije za statutarna pitanja i propise, na sjednici održanoj dana 27. marta 2025. godine, donosi

ODLUKU
o izmjeni i dopuni Statuta Grada Tuzle

Član 1.

Iza člana 96. Statuta Grada Tuzle („Službeni glasnik Grada Tuzla“ broj 6/21) dodaje se novi član 96.a, koji glasi:

„Član 96.a

Do omogućavanja uslova za provođenje izbora u mjesnim zajednicama iz prethodnog člana, Gradsko vijeće Tuzla natpolovičnom većinom bira i razrješava članove savjeta mjesnih zajednica na prijedlog klubova vijećnika političkih subjekata koji participiraju u Gradskom vijeću Tuzla, shodno izbornim rezultatima objavljenim u „Službenom glasniku BiH“ sa posljednjih lokalnih izbora i uvažavajući izborne rezultate u mjesnoj zajednici u kojoj se vrši izbor članova savjeta mjesne zajednice.“.

Član 2.

Član 168. briše se.

Član 3.

Ova Odluka stupa na snagu osmog dana od dana objavljivanja u „Službenom glasniku Grada Tuzla“.

GRAD TUZLA
Gradsko vijeće
Broj: 01/04-A-5018-2025
Tuzla, 27. marta 2025. godine

PREDSJEDAVAJUĆA

Ana Pejić, BA prava

O B R A Z L O Ž E N J E

Pravni osnov

Pravni osnov za donošenje ove Odluke je član 13. stav 2. alineja 1. Zakona o principima lokalne samouprave („Službene novine Federacije BiH“, broj 49/06. i 51/09.), član 25. stav 1. alineja 1. i član 164. Statuta Grada Tuzle („Službeni glasnik Grada Tuzla“, broj 6/21).

Članom 13. stav 2. alineja 1. Zakona o principima lokalne samouprave propisano je da Vijeće: „- *priprema i dvotrećinskom većinom glasova usvaja statut jedinice lokalne samouprave*“.

Članom 25. stav 1. alineja 1. Statuta Grada Tuzle propisano je da Gradsko vijeće u okviru svoje nadležnosti: „- *priprema i usvaja Statut Grada*“.

Članom 164. Statuta Grada Tuzle propisano je sljedeće: „*Izmjene i dopune Statuta Grada vrše se odlukom.*“.

Razlozi za donošenje

Organizacija direktnih izbora u mjesnim zajednicama, u skladu sa članom 96. Statuta, zahtijeva značajna finansijska sredstva, koja Grad Tuzla trenutno nije u mogućnosti osigurati. Troškovi bi premašili one za zvanične lokalne izbore, s obzirom na to da za ove izbore sredstva za posmatrače, štampanje izbornog materijala i druge aktivnosti nije osigurala Centralna izborna komisija BiH, već i sve troškove snosio Grad Tuzla. Pored toga:

- Potrebno je osigurati posebne izborne liste za svaku mjesnu zajednicu, za razliku od jedinstvenih lista korištenih na lokalnim izborima.
- Troškovi implementacije izbora, uključujući štampanje materijala, obuku osoblja, imenovanje i plaćanje izbornih komisija za mjesne zajednice, bili bi izuzetno visoki.

Cjelokupan proces organizacije, provođenja izbora, žalbi, implementacije rezultata, i ostalih proceduralnih koraka trajao bi minimalno godinu dana. Ovo bi dodatno opteretilo stručne službe Grada Tuzla i iziskivalo dodatne administrativne kapacitete.

Izbori u BiH već se održavaju svake dvije godine (lokalni i opći), pa bi dodatni izbori izazvali zamor kod građana. Istovremeno, provedba izbora u mjesnim zajednicama mogla bi izazvati lokalne podjele i netrpeljivost među kandidatima i građanima, što bi potencijalno ugrozilo multinacionalni karakter i jedinstvo Grada Tuzla. Takmičenje za svaki mandat bi se, u ovakvim okolnostima, moglo pretvoriti u bitku za svaku ulicu i kuću, što bi dodatno polariziralo društvo.

Predložena izmjena, koja omogućava imenovanje članova savjeta mjesnih zajednica od strane Gradskog vijeća na prijedlog klubova vijećnika, predstavlja praktično, brzo i funkcionalno rješenje dok se ne osiguraju adekvatni uvjeti za organizaciju direktnih izbora. Time bi se osigurala zastupljenost svih političkih subjekata proporcionalno njihovim izbornim rezultatima, što doprinosi demokratskom predstavljanju i očuvanju interesa svih građana.

Predlagač

Komisija za statutarna pitanja i propise